



Broj/ Број : 02/2-50-1-23-24/09

Sarajevo/ Сарајево: 31.3.2009. godine

ZAPISNIK

24. sjednice Komisije za vanjsku i trgovinsku politiku, carine, saobraćaj i komunikacije

Doma naroda

Parlamentarne skupštine Bosne i Hercegovine, održane 25.3.2009. godine

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvala je predsjedavajuća Komisije Alma Čolo.

Sjednici Komisije, u svojstvu članova, prisustvovali su: Alma Čolo, Dušanka Majkić, Adem Ibrahimpašić, Rudo Vidović, Branko Zrno i Slobodan Šaraba, te Nenad Pandurević, sekretar, i Dobrinka Savić, stručni saradnik u Komisiji.

Sjednici su, u svojstvu predlagача i izvjestilaca, prisustvovali: Hajrudin Podbičanin, pomoćnik ministra, Mithat Salić, šef Odsjeka za bilateralne i trgovinske odnose, i Šefika Tutundžić, šef Odsjeka za carinsku tarifu u Ministarstvu vanjske trgovine i ekonomskih odnosa BiH, Muhamed Smajić, sekretar, i Rajko Blagojević, šef Odsjeka za bilateralnu i multilateralnu saradnju u Ministarstvu odbrane BiH, Mirko Šekara, pomoćnik ministra u Ministarstvu prometa i komunikacija BiH, Sead Avdić, savjetnik u Kabinetu ministra vanjskih poslova BiH, Miroljub Krunić, pomoćnik ministra, i Radmila Pustahija, šef Odsjeka za evropske integracije i programiranje evropske pomoći u Ministarstvu finansija i trezora BiH, Dragana Dilber, šef Odsjeka za koordinaciju obrazovne politike u Ministarstvu civilnih poslova BiH, i Savo Marjanac, direktor Sektora privrede u Vanjskotrgovinskoj komori BiH.

Sjednica Komisije počela je u 10 sati.

Nakon što je konstatirala da postoji kvorum, predsjedavajuća Komisije Alma Čolo predložila je sljedeći

DNEVNI RED

1. Usvajanje zapisnika 22. i 23. sjednice Komisije;
2. Razmatranje Prijedloga zakona o dopuni Zakona o carinskoj tarifi BiH (druga komisijska faza), predlagач: Vijeće ministara BiH;
3. Davanje saglasnosti za ratifikaciju Sporazuma o grantu Globalnog fonda za okoliš između Bosne i Hercegovine i Međunarodne banke za obnovu i razvoj, kao Agencije za realizaciju sredstava Globalnog fonda za okoliš – Projekat šumskih i planinskih područja;

4. Davanje saglasnosti za ratifikaciju Ugovora o finansiranju između Bosne i Hercegovine i Evropske investicione banke -Projekat Koridor Vc - Prva faza - Sjever;
5. Davanje saglasnosti za ratifikaciju Sporazuma o finansiranju između Bosne i Hercegovine i Komisije Evropskih zajednica o programu finansiranja učešća u ERDF Evropskom programu međunarodne teritorijalne saradnje „Prostor jugoistočne Evrope“ na osnovu instrumenta za pretpristupnu pomoć (IPA), komponenta prekogranične saradnje za 2007. godinu;
6. Davanje saglasnosti za ratifikaciju Bilateralnog sporazuma u oblasti obrazovanja između Vijeća ministara BiH i Vlade Crne Gore;
7. Davanje saglasnosti za ratifikaciju Memoranduma o razumijevanju o budućnosti zdravstvene mreže u Jugoistočnoj Evropi u okviru Procesu regionalne saradnje u Jugoistočnoj Evropi;
8. Davanje saglasnosti za ratifikaciju Deklaracije o dugoročnom programu regionalne saradnje i razvoja u oblasti mentalnog zdravlja u zemljama jugoistočne Evrope;
9. Davanje saglasnosti za ratifikaciju Sporazuma o preferencijalnoj trgovini između Bosne i Hercegovine i Islamske Republike Iran ;
10. Davanje saglasnosti za ratifikaciju Sporazuma o privrednoj saradnji između Vijeća ministara BiH i Vlade Republike Slovenije;
11. Davanje saglasnosti za ratifikaciju Sporazuma između Vijeća ministara BiH i Vlade Republike Albanije o međunarodnom drumskom prijevozu putnika i tereta;
12. Davanje saglasnosti za ratifikaciju Sporazuma o vojnom grantu između Vijeća ministara BiH i Vlade Republike Turske;
13. Razmatranje izvještaja i informacija Ministarstva vanjskih poslova BiH:
 - Zabilješka s drugog sastanka Koordinacionog tima za vođenje kampanje za članstvo BiH u Vijeću sigurnosti UN-a za period 2010. - 2011. godina, održanog 16. 2. 2009.;
 - Izvještaj o posjeti ministra vanjskih poslova BiH Svena Alkalaja Alžiru;
 - Informacija o posjeti generalnog konzula BiH Parlamentu Baden-Wurttemberga;
 - Informacija o sastanku delegacije Narodne skupštine Republike Srpske s predstavnicima parlamenata Brisela i Flamanije;
 - Informacija o posjeti ministra vanjskih poslova Francuske Bernarda Kouchnera Bosni i Hercegovini, 9. i 10. 4. 2009.;
14. Razmatranje izvještaja o međunarodnim aktivnostima komisija i parlamentarnih delegacija PSBiH:
 - Izvještaj s prvog dijela redovnog zasjedanja Parlamentarne skupštine Vijeća Evrope za 2009. godinu, Strazbur, od 26. do 30. januara 2009.
 - Zabilješka sa sastanka članova Zajedničke komisije za evropske integracije PSBiH s Jelkom Kacinom, poslanikom u Evropskom parlamentu, u svojstvu izaslanika Hansa Gerta Potteringa;
15. Razmatranje Dopolunjenog orijentacionog plana rada Komisije za 2009. godinu;
16. Tekuća pitanja:
 - Upoznavanje s Informacijom Regulatorne agencije za komunikacije BiH o pokretanju postupka za utvrđivanje liste kandidata za članove Vijeća Regulatorne agencije za komunikacije BiH.

Predloženi dnevni red usvojen je jednoglasno.

1. **Usvajanje zapisnika 22. i 23. sjednice Komisije**
Zapisnici 22. i 23. sjednice Komisije usvojeni su jednoglasno.

2. Razmatranje Prijedloga zakona o dopuni Zakona o carinskoj tarifi BiH (druga komisijska faza), predlagač: Vijeće ministara BiH

Na početku rasprave, predsjedavajuća Komisije podsjetila je na dosadašnju proceduru, te u tom smislu naglasila da je Prijedlog zakona dostavilo Vijeće ministara, 25.12.2008., sa zahtjevom da se razmatra po hitnom zakonodavnom postupku. Dom naroda razmatrao je zahtjev za hitni postupak na 24. sjednici, održanoj 29.1.2009., odbio zahtjev da se Prijedlog zakona razmatra u hitnom postupku, i odlučio da se razmatra u skraćenom postupku. Komisija je razmatrala Prijedlog zakona u prvoj komisijskoj fazi na 23. sjednici, održanoj 18.2.2009., i jednoglasno podržala principe predloženog zakona, a Dom naroda usvojio je Prijedlog zakona u prvom čitanju na 25. sjednici, održanoj 26.2.2009.

Dalje je podsjetila da je, blagovremeno, u toku amandmanske faze amandman podnio samo Adem Ibrahimpašić i da je identičan amandmanu koji je već ranije usvojen u Predstavničkom domu: „Vijeće ministara BiH će najviše dva puta u toku kalendarske godine ponoviti utvrđene kvote za ovu tarifnu oznaku, ako to budu tražile firme koje imaju kapacitete za preradu ovog proizvoda, instalirane u Bosni i Hercegovini i ako se proizvod, koji je u pitanju, ne može osigurati po prihvatljivim cijenama na domaćem tržištu.“

Adem Ibrahimpašić kratko je obrazložio predloženi amandman i istakao da se predloženim amandmanom eliminiira mogućnost špekulacija i subjektivne ocjene Vijeća ministara BiH da li treba ili ne obnoviti kvotu u toku kalendarske godine. Nakon toga je predložio da Komisija prihvati i Domu naroda uputi sljedeći zaključak:

„Nalaže se Vijeću ministara BiH da u roku od 15 dana dostavi Prijedlog zakona o izmjenama i dopunama Zakona o carinskoj tarifi BiH prema potrebama privrede Bosne i Hercegovine“.

Nakon rasprave, predsjedavajuća Komisije podsjetila je da se Komisija prvo izjašnjava o predloženim amandmanima u skladu s članom 104. Poslovnika, a potom se glasa o Prijedlogu zakona s prihvaćenim amandmanima. Nakon toga potrebno je da se Komisija izjasni i o predloženom zaključku.

Komisija je, s četiri glasa „za“, bez glasova „protiv“ i s jednim „suzdržanim“ glasom, usvojila sljedeći amandman:

AMANDMAN I.

U članu 1. u tabeli „3. Glava 17. – Šećer i proizvodi od šećera“, u koloni „Ostali uslovi“, drugi pasus mijenja se i glasi:

„Vijeće ministara BiH će najviše dva puta u toku kalendarske godine ponoviti utvrđene kvote za ovu tarifnu oznaku, ako to budu tražile firme koje imaju kapacitete za preradu ovog proizvoda, instalirane u Bosni i Hercegovini, i ako se proizvod, koji je u pitanju, ne može osigurati po prihvatljivim cijenama na domaćem tržištu.“

Nakon toga, u skladu s članom 104. stav (4) Poslovnika Doma naroda, Komisija je, sa četiri glasa „za“ i jednim glasom „protiv“, prihvatila Prijedlog zakona o dopuni Zakona o carinskoj tarifi BiH sa usvojenima amandmanom, te predlaže Domu naroda Parlamentarne skupštine BiH njegovo usvajanje.

Komisija je većinom glasova odlučila da predloži Domu naroda donošenje sljedećeg zaključka:

„Nalaže se Vijeću ministara BiH da u roku od 15 dana dostavi Prijedlog zakona o izmjenama i dopunama Zakona o carinskoj tarifi BiH prema potrebama privrede Bosne i Hercegovine“.

U skladu s odredbama člana 107. Poslovnika Doma naroda Parlamentarne skupštine BiH, za izvjestioca na sjednici Doma Komisija je odredila Almu Čolo, predsjedavajuću Komisije.

- 3. Davanje saglasnosti za ratifikaciju Sporazuma o grantu Globalnog fonda za okoliš između Bosne i Hercegovine i Međunarodne banke za obnovu i razvoj, kao Agencije za realizaciju sredstava Globalnog fonda za okoliš – Projekat šumskih i planinskih područja**
- 4. Davanje saglasnosti za ratifikaciju Ugovora o finansiranju između Bosne i Hercegovine i Evropske investicione banke -Projekat Koridor Vc - Prva faza - Sjever**

Predsjedavajuća Komisije predložila je da se oba međunarodna sporazuma razmatraju zajedno s obzirom da su oba u nadležnosti Ministarstva finansija i trezora BiH i da se odnose na sličnu problematiku. Prijedlog je jednoglasno prihvaćen.

Obrazloženje je, u ime nadležnog ministarstva, dao Miroljub Krnić, pomoćnik ministra finansija i trezora BiH. U vezi sa Sporazumom o grantu Globalnog fonda, istakao je da je se radi o vrijednosti od 3,4 miliona USD, te da su sredstva namijenjena zaštiti nacionalnih parkova. U cjelini je podržan i usaglašen s nadležnim institucijama entiteta i trebalo bi da bude efektivna od 17. aprila ove godine.

Za drugi ugovor naglasio je da se radi o kreditnom aranžmanu između BiH i Evropske investicione banke u vrijednosti od 75 miliona eura, namijenjenom za finansiranje dionice puta na Koridoru Vc, između Drivuše (Zenica-jug) i Kaknja, u dužini od 15,2 kilometara. Ukupna vrijednost ovog projekta je 158,4 miliona eura. Ovaj kredit dogovoren je po tržišnim uslovima, bez plaćanja dodatne marže i realizira se po sticanju efektivnosti što bi trebalo da bude do kraja 2012 godine. Naglasio je da su oba sporazuma prošla valjanu proceduru i da su ih odobrili nadležni organi, te predložio da Komisija da pozitivno mišljenje i predloži Domu naroda donošenje odluke za davanje saglasnosti za ratifikaciju oba sporazuma.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:

- *Sporazuma o grantu Globalnog fonda za okoliš između Bosne i Hercegovine i Međunarodne banke za obnovu i razvoj, kao Agencije za realizaciju sredstava Globalnog fonda za okoliš – Projekat šumskih i planinskih područja;*
- *Ugovora o finansiranju između Bosne i Hercegovine i Evropske investicione banke - Projekat Koridor Vc - Prva faza - Sjever;*

- 5. Davanje saglasnosti za ratifikaciju Sporazuma o finansiranju između Bosne i Hercegovine i Komisije Evropskih zajednica o programu finansiranja učešća u ERDF Evropskom programu međunarodne teritorijalne saradnje „Prostor jugoistočne Evrope“ na osnovu instrumenta za pretpristupnu pomoć (IPA), komponenta prekogranične saradnje za 2007. godinu**

Uvodno obrazloženje dala je Radmila Pustahija, šef Odsjeka za evropske integracije i programiranje evropske pomoći u Ministarstvu finansija i trezora BiH. Naglasila je da se radi o programu koji je nastavak CARDS programa kojim je finansirano učešće zemalja zapadnog Balkana u susjedskom programu „Prostor centralne Evrope, Jadrana, Dunava i jugoistočne Evrope“ u okviru inicijative INTERREG IIIB. Ovaj program dio je prekogranične saradnje i njegov osnovni cilj je da pruži podršku učešću partnera iz zemalja kandidata i potencijalnih kandidata u zajedničkim aktivnostima na osnovu međunarodne saradnje s partnerima iz zemalja članica EU, te da upozna zemlje kandidate i potencijalne kandidate s programima teritorijalne saradnje u okviru strukturnih fondova EU, a u smislu njihove realizacije nakon pristupanja. Ovaj program je EU usvojila 18. decembra 2007. i njegova realizacija je počela, što znači da ratifikacija nije bila uslov za operativno djelovanje.

Dalje je istakla prioritete oblasti ulaganja u okviru ovog programa, i to: **inovacije** koje se odnose na stvaranje i razvoj naučnih i tehnoloških mreža i unapređenja regionalnih kapaciteta za istraživanje i tehnološki razvoj i inovacije, s obzirom na direktan doprinos ovih oblasti uravnoteženom ekonomskom razvoju; **okoliš** (zaštita voda, energetska efikasnost, prevencija rizika i aktivnosti na zaštiti okoliša sa jasnom međudržavnom dimenzijom), **dostupnost**, odnosno aktivnosti na poboljšanju dostupnosti i kvaliteta saobraćaja i telekomunikacija, zatim **održiv urbani razvoj** koji obuhvata aktivnosti na stvaranju i unapređivanju urbanih mreža i veza između grada i sela, očuvanje i promoviranje kulturnog naslijeđa i strateško integriranje razvojnih zona na međunarodnoj osnovi. Ovaj sporazum provodit će se u skladu s regulativom Evropske komisije na centraliziranoj osnovi. Postoje zajednička tijela pošto se radi o saradnji više zemalja u kojima se nalaze i predstavnici BiH. Za 2007. godinu EU donosi odluku koji je to obim sredstava, a to je ukupno 453.020 eura koliko je predviđeno i za 2008. godinu i predstavlja 85% vrijednosti projekata koji će se finansirati, dok će 15% sufinansirati korisnici ove pomoći.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju Sporazuma o finansiranju između Bosne i Hercegovine i Komisije Evropskih zajednica o programu finansiranja učešća u ERDF Evropskom programu međunarodne teritorijalne saradnje „Prostor jugoistočne Evrope“ na osnovu instrumenta za pretpristupnu pomoć (IPA), komponenta prekogranične saradnje za 2007. godinu.

6. Davanje saglasnosti za ratifikaciju Bilateralnog sporazuma u oblasti obrazovanja između Vijeća ministara BiH i Vlade Crne Gore

Obrazloženje je, u ime nadležnog ministarstva, dala Dragana Dilber, šef Odsjeka za koordinaciju obrazovne politike u Ministarstvu civilnih poslova BiH. Istakla je da je Nacrt sporazuma dostavljen nadležnom ministarstvu 27. februara 2007., te da je Ministarstvo civilnih poslova BiH provelo svu proceduru predviđenu Zakonom o postupku zaključivanja i izvršavanja međunarodnih ugovora i da je pribavilo sve potrebne saglasnosti. Predsjedništvo BiH je na svojoj 24. sjednici, održanoj 10. oktobra 2007., donijelo odluku o prihvatanju Sporazuma i ovlastilo za potpisnika ministra civilnih poslova BiH Sredoja Novića. Sporazum je potpisan 1. decembra 2008.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju Bilateralnog sporazuma u oblasti obrazovanja između Vijeća ministara BiH i Vlade Crne Gore.

- 7. Davanje saglasnosti za ratifikaciju Memoranduma o razumijevanju o budućnosti zdravstvene mreže u Jugoistočnoj Evropi u okviru Procesu regionalne saradnje u Jugoistočnoj Evropi**
- 8. Davanje saglasnosti za ratifikaciju Deklaracije o dugoročnom programu regionalne saradnje i razvoja u oblasti mentalnog zdravlja u zemljama jugoistočne Evrope**

Predsjedavajuća Komisije predložila je da se oba međunarodna sporazuma razmatraju zajedno s obzirom da su oba u nadležnosti Ministarstva civilnih poslova BiH i da se odnose na sličnu problematiku. Prijedlog je jednoglasno prihvaćen.

Uvodno obrazloženje dao je Sanjin Pandžić, viši stručni saradnik za međunarodnu saradnju u Ministarstvu civilnih poslova BiH. Rekao je da Memorandum o razumijevanju o budućnosti zdravstvene mreže u Jugoistočnoj Evropi u okviru Procesu regionalne saradnje u Jugoistočnoj Evropi predstavlja zajedničku inicijativu ministara zdravlja: Albanije, Bosne i Hercegovine, Bugarske, Hrvatske, Republike Moldavije, Republike Crne Gore, Rumunije, Srbije i Makedonije. Zdravstvena mreža Jugoistočne Evrope (JIE) radi u saradnji s jednim brojem evropskih zemalja (Belgija, Francuska, Grčka, Mađarska, Italija, Norveška, Slovenija, Švedska i Švicarska), te Vijećem Evrope, Razvojnomo bankom Vijeća Evrope, regionalnim uredom za Evropu Svjetske zdravstvene organizacije i Paktom stabilnosti za JIE. Osnovni cilj zdravstvene mreže je unapređivanje zdravlja ljudi u regionu JIE, pružanjem i održavanjem osjećaja pripadnosti i vodstva među zemljama regiona, uz provođenje zajedničke akcije u prioritnim zdravstvenim oblastima.

U vezi s Deklaracijom o dugoročnom programu regionalne saradnje i razvoju u oblasti mentalnog zdravlja u zemljama jugoistočne Evrope, predstavnik nadležnog ministarstva naglasio je da se njome potvrđuje transformiranje Projekta mentalnog zdravlja za Jugoistočnu Evropu u dugoročni Program regionalne saradnje i razvoja u oblasti mentalnog zdravlja, pod uslovima koji su izloženi u Prijedlogu regionalnih procesa saradnje u Jugoistočnoj Evropi. Deklaracijom se predviđa uspostavljanje Regionalnog centra za saradnju u oblasti mentalnog zdravlja sa sjedištem u BiH, čija je uloga da planira, koordinira i evaluira aktivnosti koje pridonose razvijanju promocije mentalnog zdravlja, prevencije, pružanja usluga i socijalne uključenosti. Primjena ove deklaracije doprinijet će rješavanju velikih potreba stanovništva za uslugama u oblasti mentalnog zdravlja u državama regiona, posebno problema kao što su stres, depresija i posttraumatski stresni poremećaj i specifičnih potreba posebno osjetljive populacije. Na kraju je dodao da su oba dokumenta prošla svu proceduru predviđenu Zakonom o postupku zaključivanja i izvršavanja međunarodnih ugovora i da je Predsjedništvo BiH na svojoj 48. sjednici, održanoj 26. novembra 2008., donijelo odluke o prihvatanju i za potpisnika ovlastilo Sredoja Novića, ministra civilnih poslova BiH.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:

- *Memoranduma o razumijevanju o budućnosti zdravstvene mreže u Jugoistočnoj Evropi u okviru Procesu regionalne saradnje u Jugoistočnoj Evropi;*
- *Deklaracije o dugoročnom programu regionalne saradnje i razvoja u oblasti mentalnog zdravlja u zemljama jugoistočne Evrope.*

- 9. Davanje saglasnosti za ratifikaciju Sporazuma o preferencijalnoj trgovini između Bosne i Hercegovine i Islamske Republike Iran**
- 10. Davanje saglasnosti za ratifikaciju Sporazuma o privrednoj saradnji između Vijeća ministara BiH i Vlade Republike Slovenije**

Članovi Komisije jednoglasno su prihvatili prijedlog da se oba sporazuma razmatraju zajedno s obzirom da se odnose na srodna pitanja.

Predstavnik nadležnog ministarstva Mithat Salić, šef Odsjeka za bilateralne i trgovinske odnose u Ministarstvu vanjske trgovine i ekonomskih odnosa BiH, dao je uvodno obrazloženje za oba sporazuma. Rekao je da je Sporazum o preferencijalnoj trgovini između Bosne i Hercegovine i Islamske Republike Iran potpisan 15. decembra 2008. u Teheranu, te dodao da se radi o prvom sporazumu ove vrste. BiH je do sada zaključivala sporazume o slobodnoj trgovini a ovo je prvi preferencijalni trgovinski sporazum. Osim Sporazuma, postoje i aneksi A, B i C. Aneksi A i B sadrže listu roba koje imaju preferencijalni karakter, dok Aneks C sadrži pravila o porijeklu. Lista roba sadrži 170 roba. Iznos preferencijala nije visok i kreće se u rasponu od 20 do 40%.

Što se tiče Sporazuma o privrednoj saradnji između Vijeća ministara BiH i Vlade Republike Slovenije, predstavnik nadležnog ministarstva istakao je da se radi o jednom u nizu tipskih sporazuma. Cilj zaključivanja ovog sporazuma je postavljanje općih uslova i proširenja privredne saradnje između BiH i Republike Slovenije. Ugovorne strane promovirat će, u skladu sa svojim zakonodavstvom, razvoj i širenje međusobno korisne privredne saradnje u svim oblastima od važnosti za privredni i društveni razvoj. Istakao je da su oba sporazuma prošla svu proceduru predviđenu Zakonom o postupku zaključivanja i izvršavanja međunarodnih ugovora te da su dobili sve potrebne saglasnosti.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:

- *Sporazuma o preferencijalnoj trgovini između Bosne i Hercegovine i Islamske Republike Iran ;*
- *Sporazuma o privrednoj saradnji između Vijeća ministara BiH i Vlade Republike Slovenije.*

11. Davanje saglasnosti za ratifikaciju Sporazuma između Vijeća ministara BiH i Vlade Republike Albanije o međunarodnom drumskom prijevozu putnika i tereta

Uvodno obrazloženje dao je Mirko Šekara, pomoćnik ministra prometa i komunikacija BiH. Rekao je da je to jedan u nizu sporazuma kada je u pitanju prijevoz. Ovaj sporazum predstavlja doprinos unapređenju prijevoza putnika i tereta između dvije države, kao i tranzit preko svojih teritorija. On obuhvata prijevoz putnika (linijski i vanlinijski) i prijevoz tereta. Prijevoznici ugovornih strana mogu obavljati prijevoz tereta između teritorija ugovornih strana, u tranzitu preko njihove teritorije ili prijevoz za i iz trećih država samo na osnovu dozvole izdate od nadležnog organa ugovorne strane. S obzirom da su s Albanijom Protokolom uspostavljeni dobri odnosi po pitanju razmjene tereta, do sada nije bilo potrebe za razmjenom dozvola, tako da se taj dio odvijao potpuno liberalno. Naglasio je da Sporazum ne podrazumijeva nikakve finansijske obaveze, te je provedena procedura predviđena Zakonom o zaključivanju i izvršavanju međunarodnih ugovora i predložio da Komisija da pozitivno mišljenje i uputi ga Domu na usvajanje.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju Sporazuma između Vijeća ministara BiH i Vlade Republike Albanije o međunarodnom drumskom prijevozu putnika i tereta.

12. Davanje saglasnosti za ratifikaciju Sporazuma o vojnom grantu između Vijeća ministara BiH i Vlade Republike Turske

Predstavnik nadležnog ministarstva Muhamed Smajić, sekretar Ministarstva odbrane BiH, dao je uvodno obrazloženje. Rekao je da je ovaj sporazum prošao svu zakonsku proceduru te da se odnosi na donaciju Republike Turske u iznosu od 605.625 turskih lira. Ovaj sporazum predstavlja kontinuitet podrške Republike Turske a u svrhu jačanja međusobne vojne saradnje i doprinosa restrukturiranju Oružanih snaga BiH.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju Sporazuma o vojnom grantu između Vijeća ministara BiH i Vlade Republike Turske.

13. Razmatranje izvještaja i informacija Ministarstva vanjskih poslova BiH:

- **Zabilješka s drugog sastanka Koordinacionog tima za vođenje kampanje za članstvo BiH u Vijeću sigurnosti UN-a za period 2010. - 2011. godina, održanog 16. 2. 2009.;**
- **Izvještaj o posjeti ministra vanjskih poslova BiH Svena Alkalaja Alžiru;**
- **Informacija o posjeti generalnog konzula BiH Parlamentu Baden-Wurttemberga;**
- **Informacija o sastanku delegacije Narodne skupštine Republike Srpske s predstavnicima parlamenata Brisela i Flamanije;**
- **Informacija o posjeti ministra vanjskih poslova Francuske Bernarda Kouchnera Bosni i Hercegovini, 9. i 10. 4. 2009.**

Predsjedavajuća Komisije podsjetila je da Komisija dostavljene informacije i izvještaje prima k znanju i daje eventualne preporuke (Kolegiju, Domu naroda i sl.). Nakon toga je istakla da je u izvještaju o posjeti ministra Alkalaja Alžiru navedeno da je predsjednik Nacionalne skupštine Alžira izrazio interes za posjetu alžirske parlamentarne delegacije Bosni i Hercegovini, te se u tom smislu u izvještaju sugerira Parlamentarnoj skupštini BiH da uputi pozivno pismo Nacionalnoj skupštini NDR Alžir da posjeti BiH tokom 2009. godine.

Na prijedlog predsjedavajuće, Komisija je podržala prijedlog Ministarstva vanjskih poslova BiH te je jednoglasno odlučila da preporuči Kolegiju Doma naroda Parlamentarne skupštine BiH da uputi pozivno pismo Nacionalnoj skupštini Narodne Demokratske Republike Alžir da njena delegacija tokom 2009. godine posjeti BiH.

14. Razmatranje izvještaja o međunarodnim aktivnostima komisija i parlamentarnih delegacija PSBiH:

- **Izvještaj s prvog dijela redovnog zasjedanja Parlamentarne skupštine Vijeća Evrope za 2009. godinu, Strazbur, od 26. do 30. januara 2009.**
- **Zabilješka sa sastanka članova Zajedničke komisije za evropske integracije PSBiH s Jelkom Kacinom, poslanikom u Evropskom parlamentu, u svojstvu izaslanika Hansa Gerta Pottinga**

Članovi Komisije primili su k znanju oba izvještaja o međunarodnim aktivnostima delegacija Parlamentarne skupštine BiH.

15. Razmatranje Dopunjenog orijentacionog plana rada Komisije za 2009. godinu

Predsjedavajuća je podsjetila da je prvobitni Orijentacioni plan rada za 2009. godinu urađen u januaru ove godine u trenutku kada još nije bio dostavljen Program rada Vijeća ministara BiH. U tom trenutku aktivnosti su planirane na osnovu aktivnosti iz Programa rada Vijeća ministara za 2008. godinu, koje spadaju u nadležnost Komisije, a koje nisu realizirane tokom 2008. godine, kao i na osnovu aktivnosti koje je Vijeće ministara BiH realiziralo u decembru, a koje su tek naknadno dostavljene Parlamentarnoj skupštini BiH u daljnju proceduru.

Dalje je dodala da je u međuvremenu Vijeće ministara BiH dostavilo Program rada za 2009. godinu te je bilo neophodno da se na bazi predviđenih aktivnosti iz Programa rada izvrši dopuna Orijentacionog plana Komisije. U Dopunjenom orijentacionom planu aktivnosti Komisije planirane su na osnovu planiranih aktivnosti tri ministarstva u Vijeću ministara BiH (Ministarstvo vanjskih poslova BiH, Ministarstvo vanjske trgovine i ekonomskih odnosa BiH i Ministarstvo komunikacija i prometa BiH) i pripadajućih upravnih organizacija čije se nadležnosti podudaraju s nadležnostima Komisije. Naravno, ovo se ne odnosi na razmatranje međunarodnih ugovora radi davanja prijedloga Domu naroda o davanju saglasnosti za ratificiranje gdje je Komisija nadležna jednako za sve međunarodne sporazume za koje se traži ratificiranje, bez obzira koje ministarstvo je nadležno za provođenje procedure zaključivanja ugovora. Dinamika planiranih aktivnosti slijedi dinamiku prema Programu rada Vijeća ministara BiH i to na način da se sve aktivnosti pomijeraju za jedan kvartal unaprijed u odnosu na kvartal u kojem je planirano dostavljanje Vijeću ministara BiH.

Članovi Komisije jednoglasno su usvojili Dopunjeni orijentacioni plan rada Komisije za 2009.godinu.

16. Tekuća pitanja:

- **Upoznavanje s Informacijom Regulatorne agencije za komunikacije BiH o pokretanju postupka za utvrđivanje liste kandidata za članove Vijeća Regulatorne agencije za komunikacije BiH.**

Predsjedavajuća Komisije konstatirala je da je Vijeće Regulatorne agencije za komunikacije BiH uputilo PSBiH informaciju u kojoj obavještava da imenovanim članovima Vijeća Agencije mandat ističe 25. aprila 2009., te da je Vijeće, s ciljem pravovremenog postupanja shodno odredbama Zakona o komunikacijama BiH, na 29. sjednici, održanoj 17.2.2009., donijelo odluku o objavljivanju javnog poziva za prijavu kandidata za članove Vijeća Agencije.

Članovi Komisije jednoglasno su primili k znanju Informaciju Regulatorne agencije za komunikacije BiH o pokretanju postupka za utvrđivanje liste kandidata za članove Vijeća Regulatorne agencije za komunikacije BiH.

Sjednica Komisije završena je u 11 sati.

Sekretar Komisije
za vanjsku i trgovinsku politiku,
carine, saobraćaj i komunikacije
Nenad Pandurević

Predsjedavajuća Komisije
za vanjsku i trgovinsku politiku,
carine, saobraćaj i komunikacije
Alma Čolo